

### **EMIR BUKOVICA - Kratka biografija**

Emir Bukovica gitaru je počeo svirati kad je imao 11 godina. Prvi bend sa imenom Metro, prva svirka, prvi demo snimci i sve prvo se desilo se još u "bivšoj" Jugoslaviji. Malo kasnije Emir je sarađivao na nekoliko alternativnijih muzičkih projekata, kao i na albumu tada popularne ženske pop rock grupe Cacadou Look.

Krajem 1993. godine Emir se odselio u SAD, gdje je završio školovanje i počino s radom na nekoliko muzičkih projekata. Ostvarujući svoj "američki san" imao je čast i sreću da se upozna i sarađuje sa nekoliko važnih i poznatih imena američke, ali i svjetske muzičke scene.

Konačno, 1998. godine u Fort Myersu, na Floridi (SAD), Emir Bukovica je osnivao svoj rock bend Emir & Frozen Camels (EFC), te postao njegov lider i autor većine pjesama benda. Osim Emira članove prve postave EFC benda su činili Amerikanci i već etablirani muzičari Cliff Williams, basista legendarnih AC/DC, bubnjar Darrell Nutt i Danny Shepard.

Već 1999. EFC su snimili svoj prvi album "San". Nakon potpisivanja diskografskog ugovora sa evropskom diskografskom kućom Dallas Records Emir je formirao balkansku postavu "smrznutih kamila".

Emir & Frozen Camels (EFC) je od tada objavio 4 albuma i više singlova a većinu pjesama je napisao Emir Bukovica.

Emir Bukovica je ostvario muzičku saradnju sa mnogim svjetskim zvijezdama, od Cliffa Williamsa iz AC/DC, US bluesera Danny Shepada, Darrell Nutta, do Lenny Kravitz, Elliott Randalla i španskog rockera Alberta Ceballosa, ali i zvijezdama iz našeg regiona (Rambo Amadeus, Djule Van Gogh, El Bahattee, Elvis J. Kurtović, itd.). Ime Emira Bukovice se našlo u službenoj biografiji legendarnog AC/DC benda ("Let there be rock").

Drugi album, "Znam" u Hrvatskoj je objavljen 2003. godine i uvršten je u Top 10 „Najboljih albuma godine“ u izboru hrvatskih muzičkih kritičara.

Pobjedom na MTV takmičenju "Catch The Frequency" Emir i njegov bend su predstavljali region na uglednom "FM 4 Frequency" festivalu u Salzburgu (Austrija), na kojem je EFC svirao u društvu Nine Inch Nails, Tool, Snow Patrol, Interpol i drugih svjetski poznatih izvođača.

Interesantan je i podatak da je Emirova pjesma "Sarajevo, New York, Roma" odabrana da bude nosilac UN projekta "Budi tolerantan - budi pametan!", koji je promovirao mir i toleranciju u regionu i na kojem su gosti bili američki blueser Danny Shepard, hrvatski hip-hoper El Bahattee i bh grupa Adi Lukovac & Ornamenti. Video spot za ovu pjesmu "zavrtio" se na više muzičkih televizija u svijetu. Ova pjesma se također našla i na oficijelnom popisu pjesama o New York City-u, među svjetski poznatim hitovima koji su opjevali "The Big Apple".

Treći album "No pasaran" je objavljen u maju 2009. godine.

Emir Bukovica je dobitnik dvije godišnje regionalne muzičke nagrade "Davorin"- u kategoriji za "Najbolju internacionalnu muzičku saradnju godine", za saradnju sa Cliffom Williamsom iz AC/DC, kao i u kategoriji za "Najbolju urbanu i rock pjesmu godine", koju je osvojila njihova pjesma "Sarajevo, New York, Roma". U 2010. Emir dobija regionalnu muzičku nagradu „Indexi 2010“ u kategoriji za „Najbolji Rock & Roll album godine“ za svoj album „No Pasaran“. Tu je i nagrada za „Najbolji album alternativne rock muzike“ po izboru radio stanica u regionu.

2013. Emir s bendom objavljuje "Best of" album na kojem su se našle najpoznatije pjesme ovog benda sa dosadašnja tri albuma.

Emirova pjesma "Ters Bosanka" je predstavljala Bosnu i Hercegovinu na imponantnom internacionalnom muzičkom takmičenju Turkvizyon 2013 i osvojili šesto mjesto, što je i do danas najveći uspjeh BiH.

Početkom 2018. godine Emir je pokrenuo i svoj solo muzički projekat nazvan BUKOWSKEE. Emir Bukovica živi u BiH, oženjen je i otac je jednog djeteta.